


Vischnaunca da Breil



Lescha da fatschentas

Determinaziuns generalas	
Art. 1	Intent
2	Egualitad dallas schlatteinas
3	Presenza allas sedutas
4	Recusaziun
5	Votaziuns
6	Elecziuns
7	Pli absolut
8	Pli relativ
9	Protocol
Cussegl da vischnaunca	
<i>I. Constituziun</i>	
10	Convocaziun
11	Elecziuns
12	Temps d'uffeci
13	Vicepresident communal e cumissiuns
<i>II. Sedutas</i>	
14	Convocaziun, tractandas
15	Sedutas extraordinarias
16	Invitaziun, gliesta da presenza
17	Perstgisas
<i>III. Tractaziuns</i>	
18	Presidi
19	Collaboraziun dalla suprastanza communal
20	Cumissiuns
21	Cumissiuns specialas
22	Presentaziun dallas posiziuns e dils acts
23	Debatta d'entrada, discussiun
24	Propostas davart igl uorden da fatschentas
25	Proposta da serrar la discussiun
26	Proposiziun da revegnir
27	Reponderaziun
28	Secunda lectura
29	Informaziun
<i>IV. Votaziuns</i>	
30	Votaziuns, disposiziuns
31	Successiun
32	Propostas cumbinadas
33	Moda da votar
34	Eruir ils resultats
35	Vusch da decisiun
36	Referendum facultativ
37	Elecziuns
38	Pli absolut
39	Pli relativ

		<i>V. Intervenziuns parlamentaras</i>
Art.	40	Principi
	41	Moziun
	42	Postulat
	43	Interpellaziun
	44	Resoluziun
		<i>VI. Protocol</i>
	45	Menar protocol, envesta e signaziun
	46	Cuntegn
	47	Approbaziun
		Suprastonza communal
	48	Organ
	49	Cumpetenzas
	50	Repartiziun dallas incaricas
	51	Departaments
	52	Convocaziun
	53	Presidi
	54	Cumpetenzas da decider
	55	Obligaziun da votar
	56	Tractaziun da fatschentas, decisiun
	57	Dumbravuschs
	58	Publicitad
	59	Protocol
	60	Suttascripziun
	61	Cumissiuns specialas
		Cumissiuns
	62	Constituziun, sedutas
	63	Cumpetenzas da decider
	64	Protocol
	65	Suttascripziun
		Determinaziuns finalas
	66	Determinaziun finala

A. Determinaziuns generalas

Art. 1

Intent La presenta lescha da fatschentas vala per tut las autoritads e cumissiuns communalas, nun che prescripziuns specialas stipuleschien enzatgei auter.
Las cumpetenzas dils organs communalas sedrezzan tenor las prescripziuns dalla constituziun communalala.

Art. 2

Egualitad dallas schlatteinas Las indicaziuns davart las persunas, las funcziuns e las professiuns ella lescha da fatschentas serefereschian da principi ad omisduas schlatteinas, aschilunsch ch'ei seresulta buc enzatgei auter dil senn dil regulativ da fatschentas.

Art. 3

Presenza allas sedutas Scadin commember d'ina autoritad ni cumissiun communalala ei obligaus d'assister allas sedutas da quellas. Perstgias motivadas ein da comunicar ad uras all'administraziun communalala per mauns dil president pertuccau.

Art. 4

Recusaziun Eventualas damondas da recusaziun el senn d'art. 9 dalla constituziun communalala vegnan examinadas e decididas all'entschatta dalla tractaziun d'ina fatschenta ed en assenza dils pertuccai.
Persunas che adempleschan ina funcziun en representanza ni per incarica dalla vischnaunca ein buc obligadas da prender stgisa.

Art. 5

Votaziuns Votaziuns vegnan fatgas per regla cun plimaun, nun ch'ei vegni pretendiu scrutini.
Ina fatschenta ei approbada, sch'il diember dallas vuschs affirmativas survarga la mesadad dallas vuschs valeivlas.
Il president votescha medemamein. En cass d'egualitad dallas vuschs vala la fatschenta per renviada.

Art. 6

Elecziuns Aschinavon ch'ei dat mo ina proposta ni che negin commember pretenda scrutini, vegnan las elecziuns singulas fatgas cun plimaun.
Survarga il diember da candidats buc il diember da posts, sa l'elecziun vegnida fatga en globo, aschinavon ch'ina successiun ei buca necessaria.

Art. 7

Pli absolut Tier las elecziuns da suprastonza decida il pli absolut. Quel vegn eruius sin fundament d'art. 12 dalla lescha davart votaziuns ed elecziuns. Il total da tut las vuschs da candidats valeivlas vegn dividius cun il dubel dil diember da posts libers augmentaus per in; il proxim diember entir pli ault ei il pli absolut. Tier tut las autras elecziuns decida il pli relativ.

Art. 8

Pli relativ El secund scrutini decida il pli relativ. Sche dus ni plirs candidats han survegniu tuttina biaras vuschs, tila igl actuar la sort.

Art. 9

Protocol Mintga autoritad e cumissiun dessegna in actuar che meina il protocol.
La suprastonza communal obtegn mintgamai il protocol.
Cun excepziun dils protocols dil cussegl da vischnaunca san tiarzas personas prender envesta dils protocols mo, sch'ellas san far valer interess fundai. A quei giavisch sa era vegnir satisfatg cun in extract dil protocol. Per regla ein tals extracts da far pèr suenter l'approbaziun dil protocol.

B. Cussegl da vischnaunca**I. Constituziun****Art.10**

Convocaziun Suenter las novas elecziuns seraduna il cussegl da vischnaunca sin invitaziun dalla suprastonza communal alla seduta constitutiva.

Art. 11

Elecziuns Il president communal arva la seduta. El empeila l'elecziun da dus dumbravuschs e silsuenter quella dil president dil cussegl da vischnaunca. Il president nieveligiu surpren silsuenter il presidi.
Ei suonda l'elecziun dil vicepresidente e digl actuar. Igl actuariat sa vegnir surdaus ad in emploiau dall'administraziun communal. Per regola ei quei il canzlist.

L'elecziun dil president e dil vicepresident vegn fatga mo en cass da plirs candidats entras scrutini. Igl actuar ed ils dumbravuschs vegnan eligi cun plimaun.

Las elecziuns per il secund, tierz e quart onn dalla perioda d'uffeci meina mintgamai il president dil cussegl da vischnaunca. Quellas elecziuns han liug ella davosa seduta digl onn d'uffeci che scada.

Art. 12

Temps d'uffeci

Il president, il vicepresident ed igl actuar vegnan eligi per in onn. Ina reelecziun ei pusseivla.

Ils dumbravuschs vegnan eligi per l'entira perioda d'uffeci.

Art. 13

Vicepresident communal e cumissiuns

Il cussegl da vischnaunca elegia all'entschatta da mintga perioda d'uffeci il vicepresident communal, tut las cumissiuns permanentas ed ils differents delegai.

Alla suprastanza communal cumpeta il dretg da far atgnas propostas.

II. Sedutas

Art. 14

Convocaziun, tractandas

Il cussegl da vischnaunca vegn convocaus sin invitaziun dalla suprastanza communal aschi savens sco las fatschentas pretendan. Il datum dallas sedutas e las tractandas vegnan fixai dil president communal en concordanza cun il president dil cussegl da vischnaunca.

Art. 15

Sedutas extraordinarias

Il cussegl da vischnaunca ei plinavon da convocar, sch'il president ni silmeins 7 cussegliers pretendan quei. L'istanza ei da far en scret alla suprastanza communal ni al president dil cussegl da vischnaunca cun indiar las fatschentas che duein vegnir tractadas.

Art. 16

Invitaziun, gliesta da tractandas

L'invitaziun allas sedutas succeda en scret sil pli tard otg dis avon cun aschuntar la gliesta da tractandas ed eventuals messadis. En cass urgents san ins untgir da quella regla.

Art. 17

Perstgisas

Perstgisas ein da comunicar ad uras all'administraziun communal per mauns dil president dil cussegl da vischnaunca. Sur dalla presenza vegn menau in protocol.

III. Tractaziuns

Art. 18

Presidi Il president empeila las tractaziuns. El procura che la lescha da fatschentas e las isonzas parlamentaras vegnien observadas. En cass ch'il president ed il vicepresident san buc esser presents, elegia il cussegl in president dil di.

Art. 19

Collaboraziun Dad assister allas sedutas dil cussegl da vischnaunca han il president communal e schinavon ch'igl ei necessari per la tractaziun dallas fatschentas annunziadas per quella seduta era ulteriurs commembers dalla suprastanza communal.

dalla suprastanza communal

Art. 20

Cumissiuns Per la predeliberaziun da fatschentas e projects da pli gronda muntada ch'ei gia vegni tractai dalla suprastanza communal sa il cussegl da vischnaunca sez ni sin giavisch dalla suprastanza communal eger cumissiuns predeliberontas. Quellas ei obligadas da dar in rapport en scret alla suprastanza communal per mauns dil cussegl da vischnaunca.

Art. 21

Cumissiuns specialas El rom da sias cumpetenzas sa il cussegl da vischnaunca eger cumissiuns specialas e fixar lur incarica e cumposiziun. La cumissiun ei obligada da rapportar en scret sur dil resultat da sia lavur. Alla suprastanza communal cumpeta il dretg da far atgnas propostas.

Art. 22

Presentaziun dallas propostas e dils acts All'entschatta dalla tractaziun d'ina fatschenta ei las proposiziuns dalla suprastanza communal da comunicar. In representant dalla suprastanza communal obtegn la pusseivladad da presentar la fatschenta. Sin giavisch expressiv san ulteriurs acts vegnir presentai e prelegi.

Art. 23

Debatta d'entrada e discussiun Tier fatschentas decida il cussegl da vischnaunca dad entrar ni buc entrar. Sch'ei vegn decidiu dad entrar, succeda la tractaziun en detagl.

Il parsura arva avon mintga votaziun la discussiun sur dalla fatschenta presentada.

Il plaid vegn daus ella successiun sco el vegn dumandaus. Tier il medem punct astga in cusseglier prender sil pli bia duas gadas il plaid. Sch'el vegn plidentaus persunalmein, astga el prender aunc ina gada il plaid. In'exceptiun ei mo pusseivla per ils commembers dalla suprastonza e per ils plidaders dallas cumissiuns predeliberontas.

La discussiun ha da serestrenscher alla caussa en tractaziun. Il president ha d'intervegnir en ina moda adattada, sche quella prescripziun vegn buc observada.

Il cussegl sa restrenscher il temps da plidar da cass a cass entras in conclus special.

La discussiun ha da setener vid las reglas dalla creanza. Remarcas che violeschan l'honor e che han da far nuot cun la fatschenta en tractaziun, astgan buca vegnir fatgas. Falliments encunter quels principis ston immediat vegnir admoni dil president. En cass gravonts eis el cumpetents da prender il plaid ad in votant. Oppona quel encunter quella mesira, decida il cussegl.

En cass da renitenza e d'in repetiu secuntener malemperneivel sa il cussegl sclauder in cusseglier dalla seduta.

Art. 24

Propostas davart igl uorden da fatschentas Vegn ei fatg ella discussiun generala ina proposta da buc entrar ni da refusar, ei la discussiun da restrenscher a quella proposta. Igl ei da vuschar surlunder avon che cuntinuar cun la discussiun generala.

Art 25

Proposta da serrar la discussiun Vegn ei fatg ina proposta da serrar la discussiun, eis ei da votar immediat sur da quella. Ina tala proposta drova per l'approbaziun 2/3 dallas vuschs valeivlas. Vegn la proposta da serrar la discussiun approvada, obtegnan mo aunc ils votants gia annunziai, il representant dalla suprastonza communal ed eventuels referents dalla cumissiun la pusseivladad da s'exprimer.

Art. 26

Propostas da revegnir Propostas da revegnir ad ina part d'ina fatschenta ein durant la tractaziun da quella fatschenta pusseivlas da tut temps avon la votaziun finala, schinavon che la maioritad dils commembers presents va d'accord. Alla fin dalla tractaziun d'ina fatschenta dat il president la pusseivladad da revegnir als singuls artechels. Il parsura sa spustar la tractaziun d'ina fatschenta, alla quala il cussegl vul revegnir, sin la fin dalla seduta.

Art. 27

Reponderaziun La reponderaziun d'ina fatschenta sa succeder cun 2/3 dallas vuschs valeivlas. Resalvai restan ils dretgs da tiarzas persunas.

Art. 28

Secunda lecziun Tier fatschentas impurtontas, leschas e reglaments sa il cussegl decider davart ina secunda lecziun.

Art. 29

Informaziun Las tractaziuns dil cussegl da vischnaunca ein publicas. Las tractandas dallas sedutas dil cussegl da vischnaunca ein da publicar egl organ da publicaziun official. La suprastonza communal informescha egl organ official davart il decuors dallas tractandas. Excepziunalmein sa il cussegl da vischnaunca concluder da deliberar las tractandas a portas serradas. El decida sur da quella damonda entras scrutini.

IV. Votaziuns**Art. 30**

Votaziuns, disposiziuns Avon mintga votaziun prelegia il president la formulaziun exacta dallas propostas. El fixescha la successiun, tenor la quala igl ei da votar sur dallas propostas. Objecziuns encunter quellas disposiziuns liquidescha il cussegl ladinamein. Il president sa ordinar che las propostas vegnien suttamessas en scret.

Art. 31

Successiun Las propostas vegnan messas sequentamein en votaziun:
a) midadas subordinadas;
b) propostas da midadas;
c) propostas principalas.
Ein pli che duas propostas principalas avon maun, vegn votau il medem mument surlunder. Mintga cusseglier astga denton votar mo per ina. Obtegn negina proposta la maioritad dallas vuschs, croda la proposta cun las pli paucas vuschs. Silsunter vegn la medema procedura applicada per las propostas restontas entochen ch'ina proposta obtegn la maioritad.

Art. 32

Propostas cumbinadas Tier propostas cumbinadas vegn votau separadamein sur dallas singulas parts cumbinadas. Sa ina damonda da votaziun vegnir separada, ha quei da succeder, sch'in cusseglier pretenda.

Art. 33

Moda da votar Per regla vegn ei votau cun plimaun. Mintga cusseglier sa pretender scrutini.

Art. 34

Erudir ils resultats Propostas e fatschentas ein approbadas, sch'il diember dallas vuschs affirmativas survarga la mesadad dallas vuschs valeivlas. Il cunterpli e las abstenziuns ein d'erudir.

Art. 35

Vusch da decisiun Il president votescha medemamein. En cass d'egualitad dallas vuschs vala la fatschenta per renviada. Tier elecziuns decida la sort.

Art. 36

Referendum facultativ Decisiuns ch'eiin suttamessas al referendum facultativ ein da publicar egl organ uffical dalla vischnaunca (art. 21 dalla constituziun communal).

Art. 37

Elecziuns Aschinavon ch'ei exista mo ina proposta ni che negin pretenda scrutini, vegnan elecziuns fatgas cun plimaun. Survarga il diember da candidats buc il diember da posts, sa l'elecziun vegnir fatga en globo, aschinavon ch'ina successiun ei buca necessaria.

Art. 38

Pli absolut Tier tut las elecziuns decida il pli absolut. Quel vegn eruius sin fundament d'art. 12 dalla lescha da votaziuns ed elecziuns. Il total da tut las vuschs da candidats valeivlas vegn dividius cun il dubel dil diember da posts libers augmentaus per in; il proxim diember entir pli ault ei il pli absolut.

Art. 39

Pli relativ El secund scrutini decida il pli relativ. En cass d'egualitad dallas vuschs decida la sort.

V. Intervenziuns parlamentaras

Art. 40

Principi Scadin cusseglier ha il dretg d'inoltrar en scret persuls ni cun auters cussegliers moziuns, postulats ed interpellaziuns al president dil cussegl da vischnaunca. En fatgs da pli pintga muntada e tals che pertuccan l'activitad dall'administraziun communal, san damondas vegnir fatgas directamein alla suprastanza communal.

Moziuns e postulats declarai sco relevonts, denton aunc buc exequi, ein da menziunar el rapport da gestiun.

Art. 41

Moziun Ina moziun ei ina proposta che oblighescha la suprastanza communal da suttametter al cussegl da vischnaunca in project ni da far ina proposta per relaschar, midar ni cassar ina lescha, in'ordinaziun ni in conclus dil cussegl da vischnaunca.

Il president communichescha la moziun al cussegl da vischnaunca. Ella vegn tractada dil cussegl enteifer treis meis dapi ch'ella ei vegnida inoltrada. Sin proposta dalla suprastanza communal sa il cussegl da vischnaunca prolungir quei termin.

Il moziunari sto motivar la moziun a bucca. Il representant dalla suprastanza communal ha da risponder ad ella. Silsuenter vegn la discussiun generala aviarta. Alla fin decida il cussegl, schebein el vul acceptar la moziun ni buc. Vegn ella acceptada, ha la suprastanza communal da corrispunder ad ella enteifer in onn. Il cussegl da vischnaunca sa prolungir quei termin sin fundament d'in rapport parzial dalla suprastanza communal.

Art. 42

Postulat Il postulat ei ina proposta nunligionta dil cussegl da vischnaunca che propona alla suprastanza communal d'intervegnir el rom dalla legislaziun ni dall'administraziun.

Il president communichescha il postulat ella medema seduta al cussegl da vischnaunca. El vegn tractaus dil cussegl da vischnaunca enteifer treis meis dapi ch'el ei vegnius inoltraus. Sin proposta dalla suprastanza communal sa il cussegl da vischnaunca prolungir quei termin.

Il postulant sto motivar il postulat. Il representant dalla suprastanza communal ha da risponder ad el. Ei suonda ina discussiun generala. Silsuenter decida il cussegl, schebein el

vul acceptar il postulat ni buc. Stat el en connex cun ina fatschenta en tractaziun, sa el era vegnir deliberaus alla fin da quella debatta.

Accepta il cussegl da vischnaunca in postulat, ha la suprastanza communal da dar rapport ed eventualmein da far propostas.

Art. 43

Interpellaziun

Cun in'interpellaziun sa in cusseglier pretender sclariment dalla suprastanza communal sur da fatgs ch'ei tenor prescripziuns vertentas buca da tener tschelau.

Il president communichescha l'interpellaziun al cussegl da vischnaunca. Ella vegn tractada immediat ni sil pli tard enteifer treis meins. Sin proposta dalla suprastanza communal sa il cussegl da vischnaunca prolungir quei termin.

L'interpellaziun vegn motivada a bucca e rispundida dil representant dalla suprastanza communal. Igl interpellant sa silsunter declarar, schebein el ei cuntents cun la risposta. Ina discussiun ha mo liug, sch'ella vegn concludida dil cussegl da vischnaunca.

Art. 44

Resoluziun

Il cussegl da vischnaunca sa prender resoluziuns enviers instanzas federalas e cantunalas ed instanzas d'autras instituziuns pertuccont fatschentas d'interess impurtont per la vischnaunca.

Propostas per resoluziuns ein d'inoltrar en scret al president dil cussegl da vischnaunca.

VI. Protocol

Art. 45

Menar protocol, envesta e signaziun

Sur dallas tractaziuns dil cussegl da vischnaunca meina igl actuar ni siu substitut in protocol.

Scadin vischin ha il dretg da prender envesta dils protocols dil cussegl da vischnaunca. Quels vegnan publicai sin la pagina d'internet dalla vischnaunca.

Il protocol dil cussegl da vischnaunca ei da signar dil president e digl actuar.

Art. 46

Cuntegn

Il protocol ha da cuntener tut las fatschentas e propostas e tut ils conclus dil cussegl sco era igl essenzial dalla discussiun. Tier votaziuns ed elecziuns ei il diember dallas vuschs dad indicar.

Declaraziuns davart in conclus per mauns dil protocol san vegnir dadas mo ella seduta, ella quala il conclus vegn prius. Quellas declaraziuns ston vegnir formuladas en scret.

Art. 47

Approbaziun Per regla vegn il protocol tarmess als cussegliers ensemen cun ils acts per la proxima seduta. El vegn mess en discussiun per approbaziun all'entschatta dalla proxima seduta. Propostas per midadas dil protocol basegnan il consentiment dalla maioritad dils cussegliers presents. Silsuenter succeda l'approbaziun dil protocol.

C. Suprastonza communal

Art. 48

Organ La suprastonza communal ei l'autoritat administrativa ed executiva suprema dalla vischnaunca.

Art. 49

Cumpetenzas Las cumpetenzas dalla suprastonza communal ein circumscrettas els artechels 42 e 43 dalla constituziun communal.

Art. 50

Repartiziun dallas incaricas La suprastonza communal reparta mintgamai all'entschatta d'ina perioda d'uffeci ils departaments e las spartas administrativas sin ils singuls commembers da suprastonza e regla la substituziun. En cass d'ina mutaziun persunala ni dil departament vegn la surdada d'uffeci reglada dils pertuccai. Tier fatschentas che tangheschan la cumpetenza da differents departaments decida la suprastonza communal tgei departament ch'ei responsabels per la tractaziun. Ei ina cunvegnyentscha tier la repartiziun dils departaments buca pussevla, decida la cumissiun da gestiun definitivamein.

Art. 51

Departaments Ils differents secturs dall'administraziun communal vegnan reparti sin 5 departaments cun las suandongtas spartas:

1. Finanzas

- fatschentas generalas
- survigilonza dallas finanzas
- survigilonza dall'administraziun

- survetsch polizial
- survigilanza giuridica
- cudisch funsil

2. Agricultura, forestalesser, serenaziun dad auas piarsas e providiment d'aua

- agricultura
- meglieraziuns da funs
- dismessa da cadavers
- alps e pastiras
- forestalesser
- dismessa e serenaziun dad auas piarsas
- providiment d'aua
- lavineras

3. Educaziun e sanitad

- scolas
- formaziun professiunala
- cultura e temps liber
- casas da tgira
- spital
- ovras socialas
- tgira ambulonta

4. Baghegiar e stradalesser

- uffeci da baghegiar
- edifecis communal senza serenera
- vias
- illuminaziun publica
- parcadis
- punts e rempars
- santeris

5. Traffic, economia e turissem

- economia
- turissem
- pumpiers
- polizia da fiug
- dismessa da rumien e deponias
- protecziun civila e militar
- plazzas da sport

Art. 52

Convocaziun

La suprastonza communal vegn convocada entras il president communal aschi savens che las fatschentas pretendan quei ni

sin giavisch da silmeins treis commembers dalla suprastanza communal.

All'invitaziun duei vegnir aschuntada la gliesta da tractandas.

Ils acts necessaris sesanflan per envesta tier l'administraziun communal e quei naven dil di che l'invitaziun vegn tarmessa.

Art. 53

Presidi

Il president communal presidiescha las sedutas. Ei il president communal impediis, presidiescha il vicepresident, lu in dils geraus che vegn nominaus avon la tractaziun.

Art. 54

Cumpetenzza da decider

La suprastanza communal ei cumpetenta da decider, sche silmeins treis commembers ein presents.

Art. 55

Obligaziun da votar

Scadin commember dalla suprastanza communal che fa part alla seduta ei obligaus da votar.

Art. 56

Tractaziun da fatschentas, decisiun

Mintga commember dalla suprastanza communal examinescha, giudichescha e presenta las fatschentas da siu departament per mauns dalla suprastanza communal.

Fatschentas d'impurtonza vegnan preparadas en stretga collaboraziun cun il president communal.

Il cau dil departament dat rapport davart eveniments specials da siu departament al president communal e fa propostas leutier.

La decisiun surstat alla suprastanza communal sco autoritad.

Art. 57

Dumbravuschs

Il protocollist ei a medem temps il dumbravuschs.

Art. 58

Publicitad

Las sedutas dalla suprastanza communal ein buca publicas.

Art. 59

Protocol

Da mintga seduta vegn menau in protocol. Il protocol cuntegn:

1. ina cuorta reproducziun dalla discussiun davart las fatschentas tractadas.
2. las propostas che vegnan en votaziun
3. il diember da vuschs che seresultan dallas votaziuns
4. ils conclus cun il text

Il protocol ei da suttascriver dil president e dil protocollist e da suttametter per approvaziun alla proxima seduta dalla suprastonza communal.

Art. 60

Suttascripziun

Il dretg dalla suttascripziun valeivla per la vischnaunca ha il president communal ni in ulteriur commember dalla suprastonza ensemen cun il canzlist ni siu substitut.

Art. 61

Cumissiuns specialas

La suprastonza communal sa numnar cumissiuns specialas per examinar e preparar fatschentas impurtontas.

La suprastonza communal circumscriva l'incarica, fixescha il diember da commembers ed elegia la cumissiun.

D. Cumissiuns**Art. 62**

Constituziun, sedutas

La cumissiun da scola, la cumissiun da gestiun e las outras cumissiuns communalas seconstitueschan sezzas, aschinavon che l'autoridad electorala decida buc enzatgei auter.

Il president convochescha e presidescha las sedutas. Leutier valan las determinaziuns generalas da quei regulativ da fatschentas conform al senn.

Art. 63

Cumpetenzza da decider

Ina cumissiun ei habla da decider, sche 3/5 dils commembers ein presents.

Art. 64

Protocol

Las cumissiuns meinan in protocol, el qual las tractaziuns ed ils conclus ein fixai cuortamein.

La suprastonza communal obtegn mintgamai ina copia per orientaziun.

Art. 65

Suttascripziun Conclus d'impurtonza ein da signar dil president e digl actuar dalla cumissiun respectiva.

E. Determinaziuns finalas**Art. 66**

Determinaziun finala Quella lescha da fatschentas ei vegnida approbada dil cussegl da vischnaunca ella seduta dils 28 da fevrer 2018 ed entra en vigur retroactivamein igl 1. da schaner 2018. Ella remplazza tut ils reglaments semegliants dallas vischnauncas d'Andiast, da Breil e da Waltensburg/Vuorz.

En num dalla suprastonza communal***En num dil cussegl da vischnaunca***

Il president: *Clau Schlosser*

Il president: *Maurus Tomaschett*

Igl actuar: *Curdin Cadonau*

Igl actuar: *Curdin Cadonau*